

2020

SLUŽBA ZA MEĐUNARODNU SARADNJU

# Izvještaj

## Međunarodna saradnja

Izvještaj o međunarodnoj saradnji Univerziteta u Sarajevu za 2020. godinu

## UVOD

Kroz koordiniranje aktivnosti s međunarodnim karakterom, posebno programa mobilnosti, uspostavljanja međunarodne saradnje sa inostranim visokoobrazovnim institucijama, te promociju međunarodnih poziva za dostavljanje projektnih prijava, Služba za međunarodnu saradnju omogućava implementaciju procesa internacionalizacije u oblasti visokog obrazovanja gdje se Univerzitet u Sarajevu prepoznaje kao atraktivni i punopravni partner u mnogim programskim i projektnim pozivima.

### **Utjecaj pandemije korona virusa na rad međunarodne saradnje Univerziteta u Sarajevu**

Pored tradicionalnih dešavanja i sastanaka u prva tri mjeseca 2020. godine, svakodnevni daljni rad je bio onemogućen zbog pandemije COVID19 zbog čega je Služba, uz podršku menadžmenta Univerziteta u Sarajevu, te prodekana i koordinatora za međunarodnu saradnju donijela određene odluke u cilju zaštite zdravlja studenata i osoblja. Služba je i u toku pandemije nastavila sa radom, vrlo često i izvan radnog vremena, poštujući donesene odluke menadžmenta Univerziteta u Sarajevu. Dešavanja, posjete, radionice i sastanci sa međunarodnim karakterom su zbog pandemije bili veoma pogođeni što je uzrokovalo da Univerzitet u Sarajevu smanji ili čak i otkaže mnoga dešavanja koja su bila dogovorena (razni kongresi i forumi) ili se tradicionalno nastavljala (staff week, sajam stipendije). Kao mnoge službe, ne želeći u potpunosti obustaviti rad, okrenuli su se virtualnim sastancima i sesijama. U cilju boljeg poznavanja rada (pod)organizacionih jedinica Univerziteta u Sarajevu, barem kada je u pitanju međunarodna saradnja, **održano je nekoliko sesija na kojem su pojedine članice predstavile svoj rad i rezultate u okviru međunarodne saradnje**. Bilo je zanimljivo slušati i svjedočiti mnogim dostignućima, aktivnostima i članstvima koje su kolege predstavile. Zbog pandemije, sesije su obustavljene sa namjerom da se nastave nakon što se ukažu uslovi za nesmetan i siguran rad i sastajanje. Dolaskom novog menadžmenta za međunarodnu saradnju (prorektorica prof. dr. Enita Nakaš) inicirano je Vijeće prodekana i koordinatora (po uzoru na Senat Univerziteta u Sarajevu) kako bi se redovno sastajali i obrađivale teme vezane za međunarodnu saradnju. Vijeće se sastaje svakog posljednjeg četvrtka u mjesecu. U toku 2020. godine održana su 2 vijeća.

## **Glavni pokretači međunarodne saradnje na Univerzitetu u Sarajevu**

### **Prorektor za međunarodnu saradnju**

U u prvoj polovini 2020. godine je otvoren poziv za izbor novog rukovodstva i menadžmenta Univerziteta u Sarajevu za period 2020-2024. na kojoj je ponovo izabran tekući rektor prof. dr. Rifat Škrijelj. Iako je ostao isti rektor, došlo je do promjene među prorektorima, tako je na mjesto dosadašnje prorektorice za međunarodnu saradnju prof. dr. Aleksandru Nikolić od 01. oktobra 2020. godine došla prof. dr. Enita Nakaš.

### **Služba za međunarodnu saradnju**

Služba za međunarodnu saradnju je aktivni nosilac međunarodnih aktivnosti Univerziteta u Sarajevu, bilo da je riječ o aktivnostima na samom Univerzitetu i/ili aktivnostima koje se realiziraju tokom boravka delegacija UNSA izvan Bosne i Hercegovine. Kroz koordiniranje aktivnosti s međunarodnim karakterom, posebno programa mobilnosti, te promociju međunarodnih poziva za dostavljanje projektnih prijava, kao i prijavljivanje vlastitih ideja i dešavanja na projektne pozive Služba omogućava implementaciju procesa internacionalizacije na ovoj instituciji, gdje se Univerzitet u Sarajevu prepoznaje kao atraktivni i punopravni partner u mnogim programskim i projektnim pozivima.

### **Prodekani/koordinatori i saradnici za međunarodnu saradnju**

Na (pod)organizacionim jedinicama Univerziteta u Sarajevu nosioci međunarodnih aktivnosti su prodekani, koordinatori i stručni saradnici za međunarodnu saradnju. Pored tradicionalnih dešavanja i sastanaka, održavaju se sastanci Službe za međunarodnu saradnju sa prodekanima, koordinatorima i saradnicima za međunarodnu saradnju – Vijeće prodekana/koordinatora. Ovi sastanci čine platformu za razmjenu mišljenja, predstavljanje izvještaja o implementaciji aktivnosti iz oblasti međunarodne saradnje na UNSA, te priliku za razmjenu iskustava naših studenata, nastavnog i nenastavnog osoblja koji su učestvovali u međunarodnim aktivnostima izvan granica Bosne i Hercegovine.

### **Odbor za međunarodnu saradnju**

Odbor za međunarodnu saradnju ima devet članova: po jedan predstavnik svake grupacije nauka/umjetnosti iz reda nastavnika/saradnika, predstavnik Službe za međunarodnu saradnju, predstavnik Studentskog parlamenta i prorektor za međunarodnu saradnju. U toku 2020. godine zbog pandemije i smanjenog obima aktivnosti Odbor nije održavao svoje sastanke, te je rad aktiviran od 2021. godine.

## **Strategija internacionalizacije Univerziteta u Sarajevu**

Proces strateškog promišljanja o internacionalizaciji je započeo dolaskom tadašnjeg rukovodstva UNSA 2016. godine, što se poklopilo s početkom implementacije Erasmus+ projekta za izgradnju kapaciteta pod nazivom „Jačanje internacionalizacije visokog obrazovanja u Bosni i Hercegovini“ (STINT) („Strengthening of Internationalisation in BiH higher education“<sup>1</sup>). Ovaj projekat je postao korisna platforma za razmjenu mišljenja između lica koja se bave srodnim poslom. Definiran je tekst strategije internacionalizacije, oblikovan na način da omogući brzo i jednostavno praćenje, ali istovremeno nudi dovoljno informacija koje su neophodne da omoguće uvid u stanje procesa internacionalizacije, resurse koji postoje na UNSA, kao i lokalne i globalne izazove u ovom segmentu. Zvanično je proces usvajanja strategije internacionalizacije završen početkom 2019. godine. Da bismo osigurali adekvatnu realizaciju ovog strateškog i akcionog plana, neophodno je bilo definirati sistem praćenja i ocjene implementacije strategije, kao i indikatore koji će omogućiti praćenje efekata i rezultata procesa internacionalizacije. Služba je od izvještaja 2018. godine počela mjeriti indikatore uspješnosti implementacije internacionalizacije, te je moguće napraviti poredbu za svaku prethodnu godinu.<sup>2</sup>

---

<sup>1</sup> 561874-EPP-1-2015-1-BE-EPPKA2-CBHE-SP, trajanje od 15. 10. 2015. do 14. 04. 2019.

<sup>2</sup> Aneks izvještaja br. 1

## Ugovori

U prvoj polovini 2020. godine potpisano je 10 novih bilateralnih sporazuma sa sljedećim institucijama:

1. Univerzitet Dokuz Eylul, Republika Turska – produženje saradnje
2. Univerzitet Erzincan binali Yildirim, Republika Turska
3. Soochow Univerzitet, Narodna Republika Kina
4. Univerzitet primijenjenih nauka, Isparta, Republika Turska
5. Bjeloruska državna poljoprivredna akademija, Republika Bjelorusija
6. Jagelonski univerzitet u Krakovu, Poljska
7. Univerzitet u Avinjonu, Francuska
8. United National Development Programs BiH
9. Univerzitet u Barseloni, Španija
10. Univerzitet u Grazu, Austrija (u okviru master programa Jugoistočne Evrope)

Također u pomenutom periodu, iskazana je inicijativa za sklapanje / produženje memoranduma o saradnji sa sljedećim univerzitetima:

- Univerzitet Aydin Adnan, Republika Turska
- Northwestern univerzitet, Sjedinjene američke države
- Ataturk univerzitet, Republika Turska
- Marmara univerzitet, Republika Turska
- Ibn haldun univerzitet, Istanbul, Republika Turska

Svi potpisani bilateralni sporazumi Univerziteta u Sarajevu i njegovih članica su dostupni na linku: <https://international.unsa.ba/bilateral/>.

## Članstva

Univerzitet u Sarajevu i pripadajuće mu organizacijske institucije su članovi 28 međunarodnih organizacija i mreža. Služba za međunarodnu saradnju je tokom 2020. godine pokrenula proceduru za članstvo u dvije nove međunarodne mreže: UNICA i Santander Grupa, a procedura je okončana krajem godine, te smo oficijelno dio ovih mreža od početka 2021. godine. **UNICA** predstavlja mrežu univerziteta iz glavnih gradova Evrope sa 53 univerziteta iz 37 glavnih gradova Evrope. Osnovana je 1990. godine, a glavni sekretarijat se nalazi u Briselu. **Santander Grupa** je osnovana 1988. godine i predstavlja integriranu mrežu evropskih univerziteta sa ciljem da omogući uvezivanje kulturnih i socio-ekonomskih vještina, kao i da razvije specifične mehanizme privilegovanih kanala informacija i razmjene u visokom obrazovanju. Više o članstvima Univerziteta u Sarajevu dostupno je na: <https://international.unsa.ba/mreze-i-asocijacije/>.

## Međunarodni projekti UNSA

Služba za međunarodnu saradnju je početkom akademske 2019/2020. godine pripremila vodič – brošuru: **Informacije o dostupnim programima saradnju za 2020. godinu za Univerzitet u Sarajevu i instrukcije za prijavu** koja sadrži podatke o Erasmus+ programu, rokovima i načinu prijave za pojedine ključne aktivnosti, te je izrađen popratni materijal kako bi se olakšala

komunikacija sa Rektoratom radi dostavljanja potpisane i pečatom ovjerene dokumentacije u toku prijave. Pored informacije o Erasmus+ programu, predstavljene su instrukcije za prijavljivanje za programe IPA, Horizont 2020 i CEEPUS. **U prvoj polovini 2020. godine Služba za međunarodnu saradnju je obradila 168 projektnih prijava na različite pozive.**

### **Erasmus+**

Univerzitet u Sarajevu je prijavio 107 projektnih prijedloga, od čega:

- 70 projekata **međunarodne kreditne mobilnosti KA107**
- 26 projekata **izgradnje kapaciteta** – 8 koordinatorskih i 18 partnerskih,
- 5 projektnih prijedloga iz oblasti **strateškog partnerstva**,
- 2 prijedloga za akciju **Jean Monnet**,
- te je u 4 projektna prijedloga akcije **Erasmus Mundus zajednički magistarski program** Univerzitet u Sarajevu pozvan kao partner.

Na ljeto 2020. godine objavljeni su rezultati šestog Erasmus+ poziva gdje je za Bosnu i Hercegovinu (izuzimajući KA107) odobreno 8 projekata i to:


- **3 projekta izgradnje kapaciteta** (među kojima i jedan koordinatorski kojeg vodi Farmaceutski fakultet)
- **1 Jean Monnet projekat**

Kada je u pitanju međunarodna kreditna mobilnost, dobili smo povratnu informaciju da je oko 50 projektnih prijedloga odobreno, a radi se o produženju saradnje (za period 2020-2022/23) ili o novim partnerima. Više informacija o našim KA107 partnerima dostupno je na: <https://international.unsa.ba/erasmus-ka107/>.

Zbog pandemije korona virusa koja je stopirala i onemogućila standardnu implementaciju projekata (i samim time trošenje finansijskih sredstava) sedmi poziv za prijave projektnih prijedloga u okviru Erasmus+ programa nije objavljen krajem 2020. godine, već odgođen za 2021. godinu. Više o projektima možete naći na: <https://international.unsa.ba/ucisce-unsu-projektima/>.

### **Ostali programi**

Pored Erasmus+ programa, Služba je obradila i 14 drugih projektnih prijava:



Prema odluci Konferencije ministara vanjskih poslova Western Balkans Funda, Udruženje za digitalizaciju i informatizaciju kulturne baštine DIGI.BA, sa ekspertima iz laboratorije Sarajevo Graphics Group (SGG) Elektrotehničkog fakulteta Univerziteta u Sarajevu, izabrano je kao jedan od pobjednika trećeg poziva za projektne prijedloge.

### **Mobilnost**

Mobilnost predstavlja međunarodnu aktivnost gdje se studentima omogućuje da dio studijskog programa (jedan ili više semestara) provedu na nekom stranom univerzitetu, dok se nastavnom i nenastavnom osoblju omogućava profesionalno usavršavanje kroz kraći boravak na partnerskim univerzitetima. Standardne aktivnosti Službe u na početku svakog semestra, ali i u toku podrazumijevaju organizovanje informativnih dana, radionica i sesija, online promociju putem web stranica i društvenih mreža, posjete potencijalnih kandidata uredima, organizovanje sastanaka i dr. Također, nakon promocije podrazumijeva se i aktivno učešće potencijalnih kandidata u pripremanju i prikupljanju dokumenata, te obezbjeđivanju potrebnih potpisa od strane odgovornih osoba (dekana i prodekana).

### **Mobilnost i Covid19**

Na početku ljetnog semestra 2019/2020. godine međunarodne dolazne i odlazne mobilnosti su bile podložne uticaju pandemije Covid19. Služba za međunarodnu saradnju je bila u stalnom kontaktu sa partnerskim univerzitetima iz zemalja članica Evropske unije i svijeta te je shodno svjetskim dešavanjima u segmentu širenja COVID- 19, još prije formalnog proglašenja globalne pandemije bilo moguće naslutiti da će doći do obustavljanja razmjene studenata i nastavnika. To se i dogodilo polovinom marta 2020. godine na način da su:

- sve nezapočete mobilnosti u dogovoru sa kandidatima i univerzitetima otkazane,
- maksimum resursa je usmjeren u podršku onima čija mobilnost je u toku i koji stoga nisu bili u svojim domovima i na matičnim univerzitetima i čiji je boravak ovisio i od organizacije na partnerskom univerzitetu (dosta njih je pokrenulo online nastavu te su

studenti, poštujući pravila izolacije i karantene, te pravila oko praćenja nastave i polaganja ispita koje su im odredili univerziteti „domaćini“ odlučili da ostanu i završe svoje obaveze)

### **Studenti (odlazna mobilnost)**

Odluka Univerziteta u Sarajevu o suspendovanju mobilnosti tokom ljetnog semestra 2019/2020. i zimskog semestra 2020/2021. godine je obuhvatila najpopularniji program Erasmus+, Mevlanu i CEEPUS i ostale programe mobilnosti. Za CEEPUS smo još ranije tražili da se sve mobilnosti pomjere za ljetni semestar 2019/2020, a kako nismo imali registrovanih mobilnosti studenata i osoblja, cjelokupni iznos za ljetni semestar 2019/2020 je vraćen Federalnom ministarstvu, odnosno Fondaciji za mobilnost). Tursko vijeće za visoko obrazovanje (YOK) još krajem februara donijelo odluku o otkazivanju konkursa za Mevlana program.


Zbog pandemije korona virusa, ograničenja kretanja u gradu i zemlji, te promjene načina realizacije nastave i organizovanja aktivnosti na Univerzitetu u Sarajevu, kao i očuvanja zdravlja studenata, nastavnog i nenastavnog osoblja Univerziteta u Sarajevu, Služba je evidentirala da nije moguće implementirati navedene aktivnosti i obezbijediti kompletiranje dokumentacije potrebne za prijavu na konkurse bez izlazaka i kršenja niza pravila kriznih štabova. S tim u vezi, Služba za međunarodnu saradnju Univerziteta u Sarajevu je smatrala da je potrebno poštovati sva pravila koja doprinose očuvanju zdravlja i suspendovati trenutno otvorene i buduće konkursne procedure za mobilnosti u zimskom semestru akademske 2020/2021. godine. U tom trenutku nije bilo moguće promovisati programe mobilnosti koji podrazumijevaju boravak izvan Bosne i Hercegovine bez potvrde odgovarajućih uslova za održavanje nesmetane mobilnosti na partnerskim univerzitetima širom Evrope, a koje nam u ovom trenutku ni kolege sa partnerskih univerziteta nisu mogli garantovati.

U ljetnom semestru 2019/2020. godine Univerzitet u Sarajevu je imao **176 odlazna studenta** kroz različite programe mobilnosti (najviše Erasmus+ 188). Zbog ranijeg početka ljetnog semestra na nekim partnerskim univerzitetima, kroz Erasmus+ njih **167** je otišlo na razmjenu, od čega se njih **32** uspjelo vratiti dok je još bilo moguće nesmetano prelaziti granicu. **Dvadeset studenata**, zbog pandemije, nije započelo svoju mobilnost, dakle nisu napustili BiH. Dakle, imali smo **135 studenata** koji su boravili na razmjeni na evropskim partnerskim univerzitetima u sljedećim zemljama: Austrija, Belgija, Češka Republika, Finska, Francuska, Hrvatska, Italija, Egipat, Latvija, Litvanija, Mađarska, Njemačka, Poljska, Portugal, Slovenija, Španija, Švedska, Turska i Velika Britanija. Sa svim studentima Služba je bila u svakodnevnoj komunikaciji, a informirani smo da su dobili instrukcije vezane za pravila ponašanja, izolacije, kao i instrukcije za praćenje online nastave i ispita od strane njihovih univerziteta domaćina. Služba je otvorila posebnu grupu preko **društvene mreže Facebook (UNSA OUTGOING)** koja služi za brže i tačnije prikupljanju informacija i komunikaciji sa studentima. Kako bi precizno mapirali studente **proveli smo anketu** kako bi prikupili informacije o statusu studenata, što nam je omogućilo da identificiramo i probleme koje smo pokušali zajednički riješiti. Naravno sve probleme nismo mogli riješiti ali smo ih registrirali i kontaktirali smo nadležne (partnerske univerzitete, ambasade BiH, nadležna ministarstva). U komunikaciji sa studentima, primili smo vijest da je pet naših studenata imalo



simptome Covid19 tokom svog boravka na Palacky univerzitetu u Olomoucu (Češka Republika). U saradnji sa ambasadoricom BiH u Češkoj Republici, svakodnevno smo pratili stanje studenata i pružali podršku na način koji nam je bio dostupan. Na sreću, studenti su se oporavili i nastavili sa svojim obavezama prema univerzitetu „domaćinu“ u skladu sa izmjenjenim režimom. U direktnoj komunikaciji sa Federalnim ministarstvom obrazovanja, nauke i mladih dostavili smo ažuriranu listu naših studenata koji su ostali u Evropi **te je dogovoreno je da se budžet iz Fondacije za mobilnost (namijenjen implementaciju CEEPUS programa u ljetnom 2019/2020. i zimskom semestru 2020/2021. godine) preusmjeri kao jednokratna pomoć tim studentima.**


U zimskom semestru 2020/2021. godine mobilnost u inostranstvo smjera je bila suspendovana zbog pogoršane epidemiološke situacije u Bosni i Hercegovini, ali i širom svijeta. Konkursi za ljetni semestar 2019/2020. godine su objavljeni na koje su se studenti mogli prijaviti, s tim da se vodila svakodnevna komunikacija sa evropskim partnerima i analizirala epidemioška situacija.



### Studenti (dolazna mobilnost)

**Univerzitet u Sarajevu je bio domaćin 122 strana studenta koji su došli sa partnerskih univerziteta na studij u kalendarskoj 2020. godini.** U toku zimskog semestra 2019/2020. polaznici ERMA programa (koji se implementira u Centru za interdisciplinarnе studije) su već fizički bili u Sarajevu prije proglašenja epidemije, dok je nova generacija u akademskoj 2020/2021. godine svoj studij na ovom programu započela online, kao i svi studenti UNSA u tom semestru. Strani studenti (48) preko Erasmus+ programa su došli u Sarajevo prije proglašenja epidemije. Njih 14 je uspjelo da se vrati svojim kućama, dok je njih 34 ostalo u Sarajevu smatrajući kao boljom opcijom po zdravlje od vraćanja kući. Služba za međunarodnu saradnju je i sa njima

održavala aktivnu komunikaciju, prvenstveno pružajući im informacije o svakodnevnim dešavanjima (policijski sat, pravila ponašanja itd.) koja nisu prevedena na engleski jezik što predstavlja prvu barijeru po njihovo zdravlje (jezičnu). Studenti koji su ostali u Sarajevu su došli iz zemalja: Albanija, Češka Republika, Francuska, Italija, Njemačka, Norveška, Poljska, Portugal, Sjeverna Makedonija, Slovačka, Španija, Srbija i Turska, te su shodno s tim obavještene i lokalne ambasade evropskih zemalja o njihovom statusu. Inostrani studenti koji su ostali su pratili online nastavu u nadi da će, kao i lokalni studenti, su uspjeti izvršiti svoje obaveze i vratiti se kući.



### **Nastavno i nenastavno osoblje**

Kada je u pitanju osoblje (nastavno, naučno i nenastavno), Univerzitet u Sarajevu je **imao odobreno 29 odlaznih mobilnosti i 50 dolazne mobilnosti u ljetnom semestru 2019/2020. godine** koje zbog trenutnog stanja neće biti implementirane u datom periodu. Najveći broj dolaznih mobilnosti se očekivao u zimskom semestru 2020/2021. godine, tačnije za vrijeme održavanja 11. sajma stipendija i 4. međunarodne sedmice obuke osoblja koje će zbog sigurnosti implementacije biti otkazana i najvjerojatnije pomjerena za ljetni semestar 2020/2021. godine.

S obzirom da su se epidemiološke prilike za implementaciju odlaznih, ali i dolaznih mobilnosti malo normalizovale, Služba za međunarodnu saradnju je u dogovoru sa odgovornim prodekanima i koordinatorima, kao i sa evropskim partnerima razmotrila situaciju i otvorila konkurse za ljetni semestar akademske 2020/2021. godine koje po pravilu objavljujemo tokom zimskog semestra.

### **Dešavanja međunarodnog karaktera**

Iako u pandemiji, Univerzitet u Sarajevu je uspio organizovati više dešavanja međunarodnog karaktera, uglavnom u online formi. Čak njih 161 je održano tokom 2020. godine, od čega 50 uživo (uglavnom početkom godine), te 110 online. Najčešće korišteni softveri za online sesije ili

webinare su bili Zoom, zatim Google meet, BigBlueButton, kao i mnoge druge opcije (Skype, Facebook rooms, itd).

Kada su u pitanju vrsta dešavanja, najviše je bilo konferencija, kongresa, seminara u formi webinarara. Svakako treba naglasiti i aktivnost predstavnika grupacije Umjetnosti koji su organizovali čak 38 različitih dešavanja: festivala, koncerata i izložbi.

Služba za međunarodnu saradnju je u prvoj polovini 2020. godine (do trenutka izmjenjenog režima rada i nastave uzrokovano pandemijom korona virusa) održala tri međunarodne aktivnosti, dok su ostale održane virtualno:

- **Januar**

- **Održan informativni sastanak sa dobitnicima stipendija programa mobilnosti:** Na osnovu raspisanih 52 Erasmus+ konkursa u zimskom semestru akademske 2019/2020. godine, zaprimljeno je nekoliko stotina prijava, te je odabrano 193 studenata i 93 nastavnika i saradnika Univerziteta u Sarajevu, tj. stipendista Erasmus+ programa, da dio svoje akademske edukacije odnosno akademskog/administrativnog rada i usavršavanja provedu na partnerskim univerzitetima u zemljama Evrope. Tim povodom Služba za međunarodnu saradnju Univerziteta u Sarajevu je organizirala informativni sastanak sa stipendistima, pri čemu su im predstavljene sve potrebne akademske i administrativne informacije, od njihovih prava, obaveza i odgovornosti, a koje ih očekuju prije, u toku i nakon mobilnosti,

- **Februar**

- **Dan dobrodošlice za strane studente u ljetnom semestru akademske 2019/2020. godine:** Služba je organizovala orijentacijski program koji ima za cilj da upozna strane studente, nastavnike i saradnike sa našim univerzitetom, njegovom historijom, tradicijom i kulturom, kao i historijom, tradicijom, kulturom i običajima našeg grada i zemlje, odnosno da im pruži sve potrebne akademske i praktične informacije.
- **Predavanje na temu: „Urbano zagađenje i energetska tranzicija, koja su rješenja dugoročno najbolja za grijanje i transport“** koje je održao dr. sc. Neven Duić, redovni profesor, Fakultet strojarstva i brodogradnje, Sveučilišta u Zagrebu. U sklopu promocije elektromobilnosti, građanima Sarajeva je ponuđena i demonstracijska vožnja električnim automobilom Tesla Model S.

- **Septembar**

- **Zoom sastanak sa predstavnicima Univerziteta u Trentu** - Služba je prisustvovala Zoom sesiji sa navedenim univerzitetom povodom sklapanja Erasmus+ KA107 sporazuma između naše i njihove institucije, te uspostavljanja saradnje iz oblasti obrazovanja.

- **Online sastanci sa Ambasadom Turske i Univerzitetom Koč** o uspostavljanju saradnje između naša dva univerziteta.
- **Održan Erasmus+ informativni ZOOM dan** povodom otvaranja konkursa za mobilnost u ljetnom semestru 2020/2021. godine, a na kojem su bile obrađene sljedeće teme: otvoreni pozivi i rokovi (trenutno otvoreni pozivi i univerziteti), kako se prijaviti (upute kome se prijavljujete i na koji način), potrebni dokumenti (koji dokumenti su potrebni i kako ih pripremiti), ključne osobe (ko se može prijaviti, pod kojim uslovima, čije odobrenje vam je potrebno), Covid19 i uticaj na mobilnost (kako je Covid19 uticao na prethodne i kako može uticati na buduće mobilnosti), tips & tricks (savjeti službe za uspješnu prijavu).
- **Oktobar:**
  - **4. staff week - Erasmus+ Zoom week** - Svake godine u oktobru Služba za međunarodnu saradnju je organizirala „Međunarodnu sedmicu obuke osoblja“ i „Sajam stipendija“, gdje bismo okupili međunarodno osoblje sa partnerskih institucija i lokalne studente i članove osoblja radi druženja, aktivnog učešća u komunikaciji, istraživanju i razmjeni informacija o potencijalnim mobilnostima i saradnji. S obzirom na to da nismo u mogućnosti fizički ugostiti drage prijatelje iz partnerskih institucija širom Evrope, odlučili smo iskoristiti prednosti moderne tehnologije i organizirati Erasmus+ Zoom sastanke (12-16. oktobar 2021. godine) u okviru između naših studenata i osoblja i međunarodnih partnera za koje je naš ured objavio poziv za mobilnost u ljetnom semestru 2020/2021. godine ([www.international.unsa.ba](http://www.international.unsa.ba)). Glavna ideja organiziranja Zoom sastanka na koji smo pozvali evropske partnere je da predstave svoju instituciju i ponudu studija te se uključe u komunikaciju i sesiju pitanja i odgovora putem „posebnih grupnih soba“ u Zoomu, dok će studenti i zaposlenici UNSA-e moći ući u sobe i postavljati pitanja. Učestvovalo je 20 partnerskih univerziteta i to:
    - Univerzitet „St. Kliment Ohridski“ u Sofiji, Bugarska
    - Univerzitet Palacký u Olomoucu, Češka Republika
    - Univerzitet Artois, Francuska
    - Poljoprivredni institut u Lilleu, Francuska
    - Katolički univerzitet u Lilleu, Francuska
    - Sciences Po, Francuska
    - Sveučilište u Zadru, Hrvatska
    - Univerzitet „Sapienza“ u Rimu, Italija
    - Univerzitet u Bolonji, Italija
    - Univerzitet „Delle Marche“ u Ankoni, Italija
    - Univerzitet u Pečuhu, Mađarska
    - Tehnološki univerzitet u Poznanu, Poljska

- Univerzitet Nova Lisboa, Portugal
  - Politehnički institut u Leiriji, Portugal
  - Politehnički institut u Beji, Portugal
  - Univerzitet „Alexandru Ioan Cuza“ u Jašiju, Rumunija
  - Univerzitet u Kragujevcu, Srbija
  - Katolički univerzitet u Valensiji, Španija
  - Univerzitet u Granadi, Španija
  - Univerzitet Balearskih ostrva, Španija
- **EU info zoom sesija** - na poziv EU info centra, Služba za međunarodnu saradnju je učestvovala u informativno online sesiji na temu promocije Erasmus+ programa, gdje smo podijelili informacije isavjete za što uspješniju prijavu, kao i očekivanja o budućnosti Erasmus+ programa.
  - **Predstavljanje UNSA na Univerzitetu u Leonu** - u cilju predstavljanja Univerziteta u Sarajevu studentima u Španiji, Služba je učestvovala u online sesiji koju je organizovao Ured za međunarodnu saradnju Univerziteta u Leonu. Imali smo priliku pričati o Sarajevu, studiranju na UNSA, te pružiti sve potrebne informacije o životu ovdje. Također smo imali aktivnu sesiju pitanja i odgovora.
  - **Zoom sesija sa UNDP-om:** ostvarena je komunikacija sa predstavnicima UNDP-a o mogućnostima saradnje našeg univerzitetu sa ovom institucijom, a što je rezultiralo potpisivanjem sporazuma sa Centrom za Interdisciplinarnu studije.
  - **Zoom prezentacija - predstavljanja Erasmus+ projekta DualSCI:** Služba je učestvovala u Zoom prezentaciji projekta dualnog obrazovanja (Strengthening capacities for the implementation of dual education in BH higher education) koju je održao rukovodilac Službe za nastavu, Saša Madacki.
  - **Zoom sesija sa Francuskom ambasdom:** Služba je prisutvovala sesiji sa Ambasdom Francuske koja je bila na temu saradnje bh. i francuskih univerziteta, a u cilju obilježavanja Erasmus dana.
  - **Zoom sesija sa predstavnicima projekta EUROWEB+:** Povodom revizije Erasmus Mundus projekta Euroweb+, kolege sa Malardalen univerziteta su organizovale zoom sastanak kako bi se prikupili potrebni dokumenti i opravdanja za nastale troškove tokom implementacije projekta.
  - **Online sastanak sa British council-om:** Služba za međunarodnu saradnju je održala online sastanak sa predstavnicima Britanskog savjeta (British council) povodom promocije učešća mladih u međunarodnim projektima. Više na: <https://www.britishcouncil.ba/en/programmes/education/sep>.
  - **Online sastanak sa Luiss Univerzitetom u Rimu:** Služba je održala sastanak sa Slobodnim međunarodnim univerzitetom za društvene nauke "Guido Carli",

povodom otvaranja i razvoja double-degree programa između ova dva univerziteta.

- **Novembar:**

- **UNIADRION okrugli stol na temu Uticaj Covid19 na studentske mobilnosti** - Glavni sekretarijat međunarodne organizacije UniAdrion u saradnji s predsjedništvom UniAdriona (Univerzitet u Primorskoj) su organizovali online Zoom okrugli stol o međuuniverzitetskoj saradnji na temu "Izazovi i odgovori visokog obrazovanja u vremenu Covid19". Cilj ovog sastanka je da se predstave iskustva članova UniAdriona kao odgovor na pandemiju. Na sastanku je predstavljena analiza međunarodne mobilnosti u periodu korona virusa, te iskustva univerziteta koji su obuhvaćeni. Naglasak je bio na uspostavljanju fleksibilnog kriznog menadžmenta na svakoj instituciji koja će moći ponuditi podršku i aktivnosti prije, u toku i nakon pandemije. Cilj je da se identificiraju slabosti i područja za napredak, kao i da se ponovo izgradi brend i reputacija mobilnosti.
- **Prvo vijeće prodekana i koordinatora** - U cilju unapređenja procesa internacionalizacije na Univerzitetu u Sarajevu, pregleda aktivnosti iz ove oblasti, te ukazivanja na potencijalne poteškoće sa kojima se susreću studenti, nastavno i nenastavno osoblje kada je u pitanju međunarodna mobilnost, Služba za međunarodnu saradnju na čelu sa prorektoricom za međunarodnu saradnju prof. dr. Enitom Nakaš organizirala je online sastanke sa prodekanima i koordinatorima za međunarodnu saradnju sa (pod)organizacionih jedinica/članica Univerziteta u Sarajevu. Sastanci su organizirani posebno sa svakom grupacijom, tako da je u četvrtak 26. novembra 2020. godine organiziran sastanak sa Grupacijom umjetnosti, Grupacijom društvenih i Grupacijom humanističkih nauka, a u petak 27. novembra održan je sastanak sa Grupacijom medicinskih, Grupacijom prirodno-matematičkih i biotehničkih i Grupacijom tehničkih nauka. Sastanci su imali agendu, koja je uključivala sljedeće teme:
  - implementacija mobilnosti u ljetnom semestru 2020/2021. godine,
  - prijava (pod)organizacionih jedinica Univerziteta u Sarajevu na međunarodne projekte,
  - definiranje statusa studenata i osoblja koji se mogu prijaviti na otvorene konkurse,
  - proces priznavanja ostvarenih rezultata na članicama UNSA i potencijalno revidiranje Pravilnika,
  - protok informacija o razmjeni,
  - podrška organizacionim jedinicama od Službe za međunarodnu saradnju.

Pored navedenih tema, fokusi sastanaka su svakako bili i na planiranu implementaciju mobilnosti u narednom semestru, odnosno sagledavanje epidemioloških uvjeta sa kojima se susreće cijela Evropa i svijet. Također, naglasak je bio i na predviđanju budućih mobilnosti u „post-covid“ vremenu, te problema i poteškoća prilikom priznavanja i prikazivanja ostvarenih rezultata koje studenti donesu nakon svoje mobilnosti.

- **Učešće putem Zooma na Dunavskoj rektorskoj konferenciji:** Nakon opsežnog izlaganja odbora konferencije sumirano se može reći da je unaoč pandemiji DRC obavljao sve predviđene zadatke i obaveze. Došlo je do intenziviranja saradnje sa Austrijom, bolja iskorištenost sredstava Jean Monet programa. Na samoj konferenciji je bilo i govora o uticaju pandemije na obrazovni sistem i potrebe za e-učenjem. Ujedno je i izabrano novo predsjedništvo.
- **Online zoom sesija sa Altibaš univerzitetom:** Služba je prisustvovala Zoom sesiji sa navedenim univerzitetom povodom sklapanja Erasmus+ KA107 sporazuma između naše i njihove institucije, te uspostavljanja saradnje iz oblasti obrazovanja.
- **Decembar:**
  - **Sajam mobilnost Univerziteta u Barseloni:** na poziv Univerziteta u Barseloni, Služba je pripremila i poslala online promotivne materijale o našem univerzitetu u cilju predstavljanja akademske ponude na online sajmu mobilnosti kojeg je organizovao ovaj španjolski univerzitet 02. decembra 2020. godine.
  - **Održan informativni zoom sastanak sa odlaznim studentima** – nakon zatvaranja konkursa za ljetni semestar 2020/2021, Služba je organizovala informativnu sesiju za dobitnike stipendija na kojoj su date informacije o obavezama, odgovornostima i pravima studenata na razmjeni, kao i očekivanja koja imaju zbog pandemije korona virusa.
  - **Održan zoom sastanak sa Univerzitetom Dokuz Eyul:** povodom dobijanja novih sredstava u okviru Erasmus+ programa, Univerzitet Dokuz Eyul iz Turske je pozvao sve institucije da prisustvuju online sastanku kako bi ih upoznao sa informacijama o programu, načinu implementacije, dostupnim sredstvima i ostalim informacijama.
  - **Održani sastanak sa dolaznim studentima u ljetnom semestru 2020/2021** – u cilju upoznavanja sa akademskim i praktičnim informacijama o Univerzitetu u Sarajevu, kao i obavještanja o potrebnim aktivnostima koje strani studenti trebaju poduzeti kako bi zadovoljili Covid19 pravila, održan je Zoom sastanak sa 15 odabranih studenata koji su odlučili da ljetni semestar 2020/2021. provedu u Sarajevu.

- **Drugo vijeće prodekana i koordinatora** – održan je virtuelni sastanak, a teme koje su se obrađivale su:
  - Erasmus+
    - šta dalje, grantovi 2020-2023, novi paket 2021-2027
    - ažuriranje liste sporazuma,
    - ažuriranje liste učesnika (dolazni i odlazni)
  - CEEPUS
  - Erasmus+ ugovor o učenju na više članica UNSA
  - Zdravstveno osiguranje dolaznih i odlaznih studenata
  - Besplatna vakcinacija i/ili testiranje za SARS-CoV-2 infekciju za učesnike u razmjeni
  - Izvještaj o međunarodnoj saradnji za 2020. godinu
  - Program rada međunarodne saradnje za 2021. godinu
  - Pravila studiranja za I, II i III ciklus na engleskom jeziku